



Ig ha mirs ufem Schlitte gmüetlech gmacht, mir z Haustuech no chli besser umbunge u d Chappe fescht über d Ohre abezoge. "So Schnäggu", fragt mi z Müüsli, "bisch parat?" "Ja Müüsli mir chöi los", gibe ig zur Antwort u z Müüsli päcklet d Schnuer vom Schlitte u springt so schnäu los, dass ig fasch abem Schlitte wär gheit. "Häb di Schnäggu", rüfe z Meiseli u z Spätzli u flüge üs lachend hingernache. Z Müüsli isch so flink ungerwägs, dass ig mi ganz guet muess häbe us mir dr iisig Wind so fescht ume Chopf umeblaast, dasses mir vor Cheuti Trändli it Ouge drückt.



Guet het mir z Grosi so warmi Sache glismet. A mir suset di schöni Winterlandschaft nur so vürbi. Dr Winter gseht scho ganz anders us aus dr Summer. Überau isches wyss u d Böim hei kener Bletter me. Kes Gresli gseht me ungerem Schnee füre luege u d Blüemli hei sich o vürsteckt. U chaut isches. Vorauem wüu z Müsli so schnäu springt.